

সূরা - ৮১

অন্ধকারাচ্ছন্ন

(আত-তাক্বীর, :১)

মক্কায় অবতীর্ণ

আল্লাহর নাম নিয়ে, যিনি রহমান, রহীম।

- ১ যখন সূর্য অন্ধকারাচ্ছন্ন হয়ে যাবে,
- ২ আর যখন তারকারা নিস্তেজ হয়ে পড়বে,
- ৩ আর যখন পাহাড়গুলোকে অপসারণ করা হবে,
- ৪ আর যখন পূর্ণ-গর্ভা উষ্ট্রীদের পরিত্যাগ করা হবে;
- ৫ আর যখন বন্য পশুদের সমবেত করা হবে,
- ৬ আর যখন সাগর-নদী ফেঁপে ওঠবে,
- ৭ আর যখন মনপ্রাণকে একতাবদ্ধ করা হবে,
- ৮ আর যখন জীবন্ত-প্রোথিত কন্যাসন্তানকে প্রশ্ন করা হবে—
- ৯ “কোন অপরাধে তাকে হত্যা করা হয়েছিল”?
- ১০ আর যখন পৃষ্ঠাগুলো খোলে ধরা হবে,
- ১১ আর যখন আকাশের ঢাকনি খোলে ফেলা হবে,
- ১২ আর যখন ভয়ংকর আগুন জ্বালিয়ে তোলা হবে,
- ১৩ আর যখন বেহেশ্তকে নিকটে আনা হবে,—
- ১৪ সত্ত্বা জানতে পারবে কী সে হাজির করেছে।
- ১৫ কাজেই না, আমি সাক্ষী মানছি গ্রহ-নক্ষত্রদের—
- ১৬ যারা চলে থাকে, অদৃশ্য হয়ে যায়,
- ১৭ আর রাত্রিকে যখন তা বিগত হয়ে যায়,
- ১৮ আর প্রভাতকে যখন তা উজ্জ্বল হতে থাকে;
- ১৯ নিঃসন্দেহ এ তো হচ্ছে এক সম্মানিত রসূলের বাণী—
- ২০ শক্তির অধিকারী, আরশের অধীশ্বরের সামনে অধিষ্ঠিত,
- ২১ যাঁকে মেনে চলতে হয়, আর যিনি বিশ্বাসভাজন।
- ২২ আর তোমাদের সাথী তো পাগল নন।

-
- ২৩ আর তিনি তো নিজেকে দেখেছিলেন স্পষ্ট দিগন্তে;
২৪ আর তিনি অদৃশ্য-সম্বন্ধে কৃপণ নন,
২৫ আর এটি কোনো বিতাড়িত শয়তানের বক্তব্য নয়।
২৬ তোমরা তাহলে কোন্ দিকে চলেছ?
২৭ এটি আলবৎ বিশ্বাসীর জন্য স্মরণীয় বার্তা বৈ তো নয়,—
২৮ তোমাদের মধ্যকার তার জন্য যে সহজ-সঠিক পথে চলতে চায়।
২৯ আর বিশ্বজগতের প্রভু আল্লাহ্ যা চান তা ব্যতীত তোমরা অন্য কোনো-কিছু চাইবে না।